



## 1 - б а п

### **Жалпы анықтамалар**

Осы Келісімнің мақсаттары үшін мынадай терминдер қолданылады:

"жанама салықтар" - қосылған құнға салық және акциз;

"нөлдік ставка" - тауарларды (көрсетілген қызметті) әкету кезінде акцизден және нөл процентке тең қосылған құнға салық ставкасынан босатуды білдіреді. Нөлдік ставканы қолдану салық төлеушіге материалдық ресурстар бойынша қосылған құнға салықты салық есебіне (өтеміне) жатқызуға, сондай-ақ алда тұрған төлемдер есебінен төленген салықтар есебіне немесе өтеміне жатқызуға құқық береді;

"апаратын ел" - кедендік аумағына тауарлар (көрсетілетін қызмет) әкелу жүзеге асырылатын мемлекет;

"шаруашылық жүргізуші субъектілер" - Тарап мемлекеттердің салық төлеушілері.

## 2 - б а п

### **Келісімнің мәнісі**

Осы Келісімнің мәнісі - сыртқы сауда-саттық операцияларын жүзеге асыру кезінде Тарап мемлекеттердің шаруашылық жүргізуші субъектілерінің арасында жанама салықтарды өндіріп алу қағидаттарын белгілеу болып табылады.

## 3 - б а п

### **Тауарларды әкету кезінде салық салу қағидаты**

1. Бір Тарап мемлекеттің кеден аумағынан әкетілетін және екінші Тарап мемлекеттің кеден аумағына әкелінетін, экспорттың кеден режиміне жатқызылатын тауарларға Тараптардың ұлттық салық заңнамасына сәйкес нөлдік ставка бойынша жанама салықтар салынады.

2. Осы баптың 1-тармағындағы ереже тұрақты газ конденсатын қоса алғанда табиғи газға, мұнайға қолданылмайды.

## 4 - б а п

### **Тауарларды әкелу кезінде салық салу қағидаты**

1. Бір Тарап мемлекеттің кеден аумағынан әкетіліп, екінші Тарап мемлекеттің кеден аумағына әкелінетін тауарларға, осы Келісімнің 3-бабының 2-тармағында көрсетілгендерден басқа, әкелінген елде оның ұлттық заңнамасына сәйкес жанама салықтар салынады.

2. Осы Келісімнің 3-бабының 2-тармағында көрсетілген және бір Тарап мемлекеттен шығатын тауарлар осы Келісімнің қатысушысы болып табылмайтын мемлекеттің кеден аумағынан екінші Тарап мемлекеттің кеден аумағына әкелінген ретте осы екінші Тарап мемлекеттің кеден аумағында оның ұлттық заңнамасына сәйкес жанама салықтар салынады.

## 5 - б а п

### **Қызметтер көрсету кезінде жанама салықтарды қолдану тәртібі**

1. Қызметтер көрсету кезінде жанама салықтарды қолдану тәртібі жеке хаттамамен ресімделеді. Осындай хаттаманың күшіне енуіне дейін көрсетілетін қызметтерге Тарап мемлекеттер заңнамасына сәйкес жанама салықтар салынады, оларға мынадай қызмет көрсету жатпайды:

а) жөнелту, тиеу, түсіру және қайта тиеу жөніндегі қызмет көрсетуді қоса алғанда, бір Тарап мемлекеттің кеден аумағынан екінші Тарап мемлекеттің кеден аумағына әкетілетін тауарларды тасымалдау және қызмет көрсету жөніндегі қызметтер;

б) жөнелту, тиеу, түсіру және қайта тиеу жөніндегі қызмет көрсетуді қоса алғанда, тауарларды жөнелту немесе жеткізу пункттері Тарап мемлекеттер аумақтарында орналасқан жағдайда транзиттік тауарларды тасымалдау және қызмет көрсету жөніндегі қызметтер;

в) жолаушылар мен жүктерді бір Тарап мемлекеттің кеден аумағынан екінші Тарап мемлекеттің кеден аумағына апару және кері бағытта тасымалдау жөніндегі қызметтер.

2. Осы баптың 1-тармағының "а", "б" және "в" тармақшаларында көрсетілген қызметтерге, оларды Тараптар белгілейтін тәртіптерге сәйкес көрсету фактісі расталған жағдайда, осындай қызмет көрсететін салық төлеушілер мемлекетінде нөлдік ставка бойынша қосылған құнға салық салынады.

## **6 - б а п**

### **Тауарлардың өтуіне және жанама салықтарды төлеуге бақылау**

1. Тауарлардың өтуіне, есеп жүргізуге және ақпарат алмасуға бақылауды жүзеге асыру мақсатында Тараптар Тәуелсіз Мемлекеттер Достастығының Сыртқы экономикалық қызмет тауарлық номенклатурасын (ТМД СЭҚ ТН) пайдаланады.

2. Бір Тарап мемлекеттің кеден аумағынан екінші Тарап мемлекеттің кеден аумағына тауарларды әкелу (әкету) кезінде қосылған құнға салықтарды өндіріп алуды және олардың төленуіне бақылау жасауды осы Келісімге қатысушы мемлекеттердің кеден және салық органдары жүзеге асырады.

## **7 - б а п**

### **Келісімнің орындалуы**

1. Осы Келісімді түсіндіруге немесе қолдануға байланысты келіспеушіліктерді Тараптар келіссөздер арқылы шешетін болады.

2. Тараптар қажет болған ретте осы Келісімді іске асыру барысын бағалауға және оған өзгерістер мен толықтырулар енгізудің орындылығына қатысты консультациялар өткізеді.

## **8 - б а п**

### **Келісімге өзгерістер мен толықтырулар енгізу**

Тараптар өзара келісім жағдайында осы Келісімге қажетті толықтырулар мен өзгерістер енгізеді, олар Келісімнің ажырамас бөлігі болып табылатын жеке Хаттамалармен ресімделеді.

## 9 - б а п

### **Келісімнің қолданылу мерзімі**

1. Осы Келісім оның күшіне енуі үшін қажетті мемлекетішілік рәсімдерді Тараптардың орындағаны туралы соңғы жазбаша хабарламадан кейін 2001 жылдың 1 ш і л д е с і н д е кү ш і н е е н е д і .

2. Осы Келісім бес жыл мерзімге жасалады және егер Тараптардың бірде-бірі кем дегенде кезекті мерзім аяқталардан 6 ай бұрын оның қолданысын тоқтату ниеті туралы дипломатиялық арналар бойынша жазбаша хабарламаса, келесі бесжылдық кезеңдерге өздігінен ұзартылады.

Астана қаласында 2000 жылғы 9 қазанда әрқайсысы қазақ және орыс тілдерінде екі түпнұсқа дана болып жасалды және де екі мәтіннің күші бірдей.

Қазақстан Республикасының Ресей Федерациясының  
Үкіметі үшін Үкіметі үшін